

# Nahum

Asiria tabata un impero di malbadonan kruel. Dios tabata kla pa baha Su rabia riba e kapital, Nínive. Ma promé ku E lo destruí Nínive, Dios a duna nan un chèns mas pa repentí. El a manda Su profeta pa avisá nan. Jonas a prediká, nan a repentí na masa, i Dios a spar e stat.

Kiko a pasa ku Nínive despues di Jonas? Nos no sa presis. Ma probabelmente Jonas lo a bisa e habitantenan di Nínive ku Dios ta “*yen di grasia i kompashon...no ta rabia lihé i ta abundá den misericòrdia*” (Jonas 4:2). Kisas despues di tempu e habitantenan di Nínive a kuminsá rasoná meskos ku nos—“Komo ku Dios tin tantu pasenshi i ta misericòrdioso, nos por hòrta shòrt i djòdjò un poko mas den piká!” Echu ta ku Nínive a regresá na su piká. Shen pa 130 aña despues ku Jonas a prediká na Nínive, desensientenan di esnan ku a repentí tabata kometé aktonan pekaminoso mes malu òf pió ku nan antepasadonan: violensia, gañamentu, bruheria, idolatria, immoralidat, orguyo, arogansia, materialismo, èts. tabata komún.

Atrobe Dios tabata kla pa kastigá Asiria. Atrobe Dios a manda un mensahero pa laga sa ku destrukshon di Nínive ta na kaminda. E biaha aki, nòmber di e mensahero tabata Nahum. I e biaha aki, Nínive a nenga bira di su piká, nan a nenga yuna i bisti paña-di-saku, nan a nenga pidi Dios pa Su pordon. I komo resultado, no tabatin skapatorio mas pa Nínive. Pues, den un sintido, Nahum ta kontinuashon di e buki di Jonas. Kasi por yama Nahum “2 Jonas”. Jonas a prediká di Dios Su grasia i Nínive a repintí. Nahum a prediká di Dios Su furia pasobra nan no a repintí!

Ma Jonas i Nahum no tabata e únikonan ku a profetisá di Dios Su huisio pa ku Asiria. Isaias tambe a hasié (10:5-19; 14:24-27; 17:12-14; 18:4-6; 29:5-; 30:27-33; 31:5-9; 33; 37:6-,21-35) i Sofonias (2:13-15).

Laga nos para ketu un ratu i pensa tokante e suidat lokalísá pariba di e riu Tigris, Nínive. Di bèrdat, el a konsistí di kuater stat. Tur huntu, e suidat a kubri un area di 560 kilometer kuadrá. Ora Jonas a bishitá Nínive, e tabata e suidat mas grandi di Asiria. Ma e no tabata su kapital. Tabata rei Senakerib (704-681 B.C.) ku a hasi Nínive kapital di Asiria. El a hasi e suidat tres bes mas grandi, a konstruí un palasio luhoso, a traha parkenan i hòfinan.

Durante bida di Nahum, Nínive tabata na kulminashon di su splendor, grandesa, rikesa i poder (Nahum 3:16-17). Den e era ei, hende a pensa ku ta impusíbel pa konkistá Nínive. Su murayanan di defensanan tabata inkreibelmente impreshonante. Ningun otro suidat tabatin murayanan asina fuerte. E murayanan tabata 12½ kilometer largu, pasando rònt e parti prinsipal di e stat di Nínive. Nan tabata 30 meter haltu i 15 meter hanchu. E murayanan tabata asina diki ku tres garoshi por a kore riba e murayanan banda di otro. I riba e murayanan tabatin 1500 toren di fortifikashon, kada toren 61 meter haltu. I pafó di e suidat, rònt di e murayanan, tabatin kanalnan. Pa un sòldá enemigu por a yega mes na e murayanan, e lo mester landa un destansia di 46 meter. I pa dreña e stat, tabatin 15 porta bon fortifiká, ku forma di leonan i toronan parando na e portanan.

Den e stat tabatin palasionan, setenta sala dòrná masha bunita, biblioteka i hòfinan bunita. Tèmpel di e suidat tabata den forma di un piramida.

Segun Jonas 4:11, e suidat tabatin 120.000 habitante ku “no sa diferensia entre nan man drechi i man robes”. Si tabatin tantu beibi, ta kalkulá ku poblashon di Nínive lo tabata mas òf

ménos 1 mión tempu di Jonas. Den era di Nahum, e poblashon lo tabata mas ku esei.

Tabata na e tempu aki—na kulminashon di e gloria di impero di Asiria i su kapital, Nínive—ku Nahum a profetisá ku Nínive lo wòrdu konkistá i destruí. El a pronostiká Dios Su kastigu ora tur e enemigunan di Asiria tabata bou nan dominio. Asta Egipto, hopi leu for di Nínive, a wòrdu konkistá. Nahum a profetisá destrukshon pa Nínive tempu ku a parse impusibel ku e profesia por wòrdu kumplí!

## I. OUTOR DI E BUKI

Nos sa kasi nada di e profeta Nahum. Nos sa solamente loke su buki ta konta, i esei ta solamente su nòmber i su stat natal.

E nòmber hebreo *Nahum* ta nifiká konsuelo, konsolashon òf konsoladó. E buki di Nahum lo tabata un konsuelo pa e pueblo di Dios, pasobra e ta papia tokante destrukshon di Nínive, kapital di nan enemigunan, Asiria. Nahum ta un forma kortiku di Nehemias. Ningun otro Nahum ta mensioná den Tèstament Bieu. Ma e nòmber Nahum ta bin dilanti den Lukas 3:25. Sinembargo ta kasi sigur ku esei no ta e mésun Nahum, esta e profeta Nahum.

Nahum a laga sa ku su stat natal tabata Elkos (Nahum 1:1). Ma asta esei no ta yuda mashá pasobra ningun hende sa unda Elkos tabata lokalisá. Diferente pusibilidat ta surgerí. Algun estudiante di Beibel ta kere ku Elkos tabata lokalisá na Asiria, nort di Nínive (na Irak awendia) serka e riu Tigris. Nan ta identifík’é komo Elqush, serka di Mosul. Asta tin un tradishon ku Nahum a nase ei i ku su graf t’ei. Otronan ta haña ku Elkos a keda na Galilea. Jerome a identifíká Elkos komo Elkesi òf El Kauze na Galilea. Kapernaum, lokalisá na Galilea ta e di tres opshon. Si esaki ta bèrdat, Nahum a nase na Galilea (un stat di Israel, e nashon di nort), anto a muda pa Juda tempu ku Asiria a konkistá Israel. Segun e teoria aki, despues di tempu, Elkos a kambia su nòmber pa onra Nahum. Nan a yama e stat “Kapernaum” (Kafar-Nahum na idioma hebreo), ku ta nifiká stat di Nahum. E di kuater pusibilidat ta ku Elkos tabata e stat di Bir el-kaus, un pueblo di Juda sùitwèst di Jerusalèm, meimei di Jerusalèm i Gaza. E úniko kos ku nos por bisa sigur di e stat natal di Nahum ta ku nos no sa sigur unda Nahum a nase. Ma Nahum 1:15 por duna impreshon ku Nahum a biba na Juda.

Nahum a skirbi di un nashon stranhero. Pa e por a hasi esei, e lo mester tabatin aksesu na informashon tokante Nínive sea tabata direct òf indirèkt. E lo mester tabata na haltura di su historia. Tambe e sa di e konkista di No-amon na Egipto (3:3-10). Tur esaki por indiká ku Nahum tabatin bastante kontakto ku un suidat mas grandi unda e por a haña informashon internashonal.

Maske e buki di Nahum ta skirbí tokante Nínive, indudabelmente Nahum su ministerio no tabata dirigí solamente den un direkshon internashonal. E lo tabata un profeta fiel pa su mes pueblo na Juda

## II. FECHA DI E BUKI

Promé ku nos ta yega na e fecha, nos ke nota algun punto.

### A. ERA HISTÓRIKO DI E BUKI DI NAHUM

Asiria a terorísá otro nashonnan pa mas òf ménos 500 aña. Nan tabata hende masha kruel den guera. I despues di un konkista, nan a maltratá esnan ku nan a kapturá na un forma salvahe. Nos ya kaba a mira den nos estudio di e buki di Jonas, e asirionan tambe tabata kruel, derando hende bibu, èts.

Entre otro, ta parse ku ya kaba Asiria a invadí e tera ku Dios a duna Su pueblo dos biaha promé ku Nahum a skirbi su buki. Rei Sargon II a konkistá Israel na aña 722 B.C. (2 Reinan 17:6) i rei Senakerib a hera konkistá Juda na aña 701 B.C. (2 Reinan 18:13-18). Si Dios no a protehá Jerusalèm na un forma milagroso na e último okashon, Jerusalèm sin duda tambe lo a kai.

Asurbanipal (669-633 B.C.) tabata e último rei poderoso di Asiria. E tabata un bon sòldá, ma un hòmbler masha kruel. Esnan ku el a kapturá den guera i despues, el a soya nan bibu. El a

ranka lepnan, brasanan i pianan di reinan kita. E rei aki a obligá prensnan kologá kabes di nan rei tur na sanger rònt nan garganta i bistié asina manera un kadena. Na un okashon Asurbanipal a kome ku kabes di un rei di Kaldea kologá riba dje. Probablemente Nahum a skirbi su buki durante reinado di Asurbanipal—tempu impero di Asiria tabata na kulminashon di su poder.

Nos no sa sigur, ma ta probabel ku Nahum a skirbi su buki durante reinado di e bon rei di Juda, Josias (2 Reinan 22-23).

## **B. FECHA DI E BUKI DI NAHUM**

Dos evento menshoná den e buki di Nahum ta duna indikáshon general di e fecha ku e buki a wòrdu skirbí. Pa di promé, Nahum a profetisá un evento ku lo sosodé den futuro. Henter e buki ta papia kla tokante e kaída di Nínive. E konkísta di Nínive a sosodé na aña 612 B.C. Pues, Nahum mester a skirbi su buki promé ku e evento ei a sosodé.

E di dos evento ku Nahum a menshoná, ta un evento ku a sosodé promé ku el a skirbi su buki, e konkísta di No-amon (3:8-10). Asurbanipal, rei di Asiria, a konkistá Tebes, kapital di Egipto sùit, na aña 663 B.C. E siudat tambe tabata yamá No-amon, debí ku nan a adorá e dios Amon ei. Pues, Nahum mester a skirbi e buki despues di aña 663 B.C.

Kisas algun otro punto por yuda pone un fecha pa e buki aki. Ta interesante ku pa aña 650, e egipsionan a kore ku e ehersito di Asiria for di nan tera i a re-konstruí e stat di Tebes. Probabelmente Nahum lo no a usa e ehèmpel di No-amon, si Egipto ya kaba a re-konstruí e suidat aki.

Durante e periodo di tempu entre 663 i 612 B.C., Juda tabatin prinsipalmente dos rei: Manasés (695-642 B.C.) i Josias (640-609 B.C.). Manasés tabata un mal rei ku a guia su pueblo pa desvia for di Señor. Ma mas na fin di su reinado el a repintí. En kontraste, Josias a guia e pueblo di Juda bèk den kaminda di Señor. Maske e buki di Nahum ta dirigí kontra Nínive, ta opvio ku e ta papia di Juda na un manera favorabel. Si Manasés tabata rei tempu ku Nahum a skirbi e buki, ta dudabel ku Nahum lo a keda sin reprendé Juda tambe.

Talbes esaki por duna indikashon ku Nahum a skirbi entre 655-650 B.C. Nos no por bisa sigur. Ma nos por bisa ku siguridat ku e buki di Nahum a wòrdu skirbi entre 663-612 B.C.

## **III. PROPOSITO PA E BUKI**

Por bisa ku e motibu ku Nahum a skirbi ta pa laga sa di e kaída di Nínive i e hustifikashon di Juda. Dios soberano, santu i bondadoso lo kastigá e malechornan di Nínive i lo spar Juda rekto. Si Josias tabata rei di Juda tempu ku Nahum a skirbi su buki, Juda tabata sigui Dios...por lo ménos di aparenzia.

Pues, por bisa ku tin dos lema klave den e buki di Nahum:

### **A. E SANTIDAT DI DIOS**

E santidat di Dios ta inkluí tantu Dios Su kastigu di inkrédulonnan rebèlde komo Dios Su kompashon pa ku Su mes hendenan. Awendia nos ta tende asina tantu énfasis riba e amor di Dios ku kasi ta “piká” pa papia tokante e santidat, rabia, hustisia i rektitut di Dios!

Tin kreyente ku kasi ta duna impreshon ku Dios a kiboká ora El a inkluí e buki di Nahum den Beibel. Nan ta haña ku bukinan manera Nahum ku ta énfatisa ku Dios ta santu ta muchu negativo! Raymond Calkins a bis’é bon: “Siguramente tin un lugá pa un buki manera Nahum den e revelashon di Grasia. Na lugá di saka e buki di Nahum for di Beibel, mihó nos lag’é ei.

Nos tin mester di dje. E ta rekordá nos ku stimashon ta para bira un sintimentu kariñoso insierto si e no ta balansá dor di e kapasidat di rabia hustu. Un hende ku ta bèrdaderamente un hende deboto semper ta un hende ku sa rabia. Pasobra e ta stima Dios i hende, e ta odia i despresiá inhumanidat, krueldat, i maldat. Kada bon hende tin ora ta profetisá manera Nahum.”. Laga nos sòru pa mantené e balans!

### **B. E KASTIGU DI NÍNIVE**

Nínive tabata e stat mas renombrá di mundu e tempu ei. Ta notabel ku dos buki di Beibel

ta skirbí di e gran stat aki: Jonas i Nahum.

Pa e lektornan original di buki di Nahum, e kastigu di Nínive lo tabata un aviso pa Nínive mes. Nahum ta laga sa ku nan mester repentí—meskos ku nan antipasadonan a hasi ora Jonas a prediká. Ma di bèrdat, na lugá di ta un yamada pa repentí, e ta mas bien un deklarashon ku kastigu ta bin. I e buki tambe ta un spiertamentu pa Juda. E pais di Juda mes no tabata asina santu. E buki lo tabata un aviso pa nan tambe pasobra e mensahe kla a bin dilanti ta: Dios ta kastigá piká!

Un di tres reakshon di parti di e lektornan original lo tabata ku e buki di Nahum tabata un konsuelo pa Juda. E hendenan di Juda, mirando e maldat di Asiria lo tabata hasi pregunta: Pakiko Nínive tan kruel ta prospera? Dios a bandoná Juda? Dios no ta hustu mas? Nahum a kontestá e preguntanan ku e hendenan. Nahum su nòmber ke men konsuelo. Nahum su mensahe tabata un konsuelo pa e puebel di Dios ku tabatin tantu miedu di Asiria tan kruel. Dor di anusiá e destrukshon di Asiria, enemigu di puebel di Dios, nan a wòrdu konsola. Ningun hende ku a tende e mensahe aki lo a sinti duele pa Nínive pa motibu di su pikánan i krueldat tan grosero.

Nahum tabata asina mará na su lema ku e no a menshoná e pikánan di Juda i e konsekuente kastigu ku Juda siguí pa su restorashon. Ma un pusíbel motibu ku Nahum no a menshoná esaki tabata pasobra Josias tabata rei di Juda i tabata enkurashá un revivamentu spiritual den su pais.

#### **IV. LEKTORNAN DI E BUKI**

E buki di Nahum klaramente ta tokante e suidat di Nínive for di e promé vèrsíkulo di e buki. Pues, Nínive ta lema di e outor.

Ma no ta probabel—maske no ta impusíbel—ku Nahum a skirbi su buki spesífikamente pa e habitantenan di Nínive. E tabata skirbí mas bien pa e pueblo di Juda (p.e. 1:15) maske Nahum kasi no a menshoná su mes nashon. Nahum klaramente a kontestá preguntanan ku hende di Juda a lamta...loke nos djis a kaba di menshoná. Preguntanan manera pakiko Nínive tan kruel ta prosperá? Pakiko Dios a bandoná Juda? Unda Dios Su huisio a keda? Nahum lo a skirbi su buki pa enkurashá e pueblo di Juda ku Dios ta bai kastigá Asiria.

#### **V. STRUKTURA I KONTENIDO DI E BUKI**

Lo siguiente ta un skema ku ta mostra tantu riba Dios komo riba Nahum su mensahe dirigí kontra Nínive:

- I. DIOS TA YALURS: E SIGURIDAT KU NÍNIVE LO KAI – 1
- II. DIOS TA HUES: E DESKRIPSHON DI NÍNIVE SU KAÍDA – 2
- III. DIOS TA HUSTU: E MOTIBUNAN PA NÍNIVE SU KAÍDA - 3

Nos ke hala e lektor su atenshon na djis un par di punto den e teksto ku ku por klaria e mensahe di Nahum.

Kapítulo ún ta un salmo ku ta deskribí vários atributo di Dios, demonstrando ku E ta reina riba universo i por huzga Nínive. E énfasis ta riba Dios mes komo Hues. E ta deskribí Dios komo yalurs, vengativo, rabiá, grandi den poder, lo no keda sin kastigá e kulpabel. Ma Dios tambe ta deskribí aki komo un Dios ku ta tarda pa rabia, ta bon, ta un “lugá fortifiká den e dia di angustia” (1:7).

Despues ta sigui un sekshon ku ta bruha hopi hende. Den 1:9-2:2 Nahum no a papia di solamente ún pueblo sino dos, tantu Nínive komo Juda. Ta importante pa sa na kua el a referí pa komprendé e teksto. Loke ta sigui ta e teksto indikando na kua pueblo Nahum a referí den e teksto: 1:9-12a - Nínive

1:12b-13 - Juda

1:14 - Nínive

1:15 - Juda

2:1 - Nínive

2:2 - Juda

E echu ku Nahum ta keda referí bèk na Juda ta indiká ku e buki ta skirbí pa habitantenan di Juda.

Kapítulo dos, Nahum a profetisá kon Nínive lo kai. E ta un deskripshon di su konkísta. Por ehèmpel, 2:6 ta papia di e “portanan di e riunan” ku lo wòrdu habrí, klaramente deskribiendo e kaída di e murayanan dor di e inundashon. Anto kapítulo tres ta duna motibunan pa e destrukshon di Nínive.

Den 3:8-10, Nahum a skirbi di No-amon. No-amon ta un otro nòmber pa Tebes, kapital di Egipto, ku Asira a konkistá na aña 663 B.C. Nahum a kompará e konkísta di Nínive ku esun di No-amon. Tur dos siudat tabata bon fortifiká, tur dos tabatin nan aliadonan, ma tòg enemigunan a konkistá nan tur dos.

## **VI. OPSERVASHONAN DI E BUKI**

Nota tambe algun otro punto interesante di e buki.

### **A. STAIL DI E BUKI DI NAHUM**

E promé kapítulo ta skirbí na un forma poétiko. I por bisa ku Nahum a skirbi poesia di alta kalidat. E bunitesa di e poesia ta parse ku e ta kontradisí e severidat di e mensahe di Nahum. En konteste, kapítulonon dos i tres ta mas bien profétiko

### **B. ÒRDU DI PROFESIANAN DI NAHUM**

Nahum ta kambia e òrdu normal ku profetananan a skirbi. Mayoria buki profétiko a kuminsá ku denunsianan i a kaba ku bendishon. Ma Nahum a kuminsá ku bendishon i klousurá ku denunsianan.

### **C. KUMPLIMENTU DI E PROFESIA DI NAHUM**

Nahum a profetisá e morto di Nínive...su destrukshon total. Kòrda, ta kasi sigur ku Nahum a skirbi su buki durante reinado di e gran rei di Asiria, Asurbanipal. Ningun hende lo por a imaginá mes ku apenas 21 aña despues di morto di Asurbanipal na aña 633 B.C., e Impero di Asiria lo wòrdu konkistá i lamta nunca mas!

E profesianan di Nahum ta asina remarkabel pa motibu di nan eksaktitut. Dios a usa dos medio pa kumpli ku e profesia di Nahum i destruí Nínive, e kapital di Asiria, huntu ku e impero di Asiria na aña 612 B.C. El a usa ehersito di e medonan, kaldeonan i sintianan. Tambe Dios a hasi uso di un inundashon kousá pa e riu Tigris (1:8; 2:6,8). Historia ta laga sa kiko a sosodé.

E medonan, kaldeonan i sintianan a uni nan tropanan huntu pa bringa kontra e Impero di Asiria. E bataya kontra Asiria tabata tuma lugá den e sabananan espasioso. Rei di Asiria tabata asina sigur ku e lo derotá e enemigu ku el a pone un fiesta pa su sòldánan. E enemigu a haña sa di e fiesta i buracheria i a ataká mes ora. Asiria tabata asina mal prepará pa e ataka ku nan a pèrdè hopi sòldá. Nan a hui dreña Nínive—e stat ku supuestamente ningun ehersito por konkistá.

E enemigu a rondoná e suidat di Nínive pa dos aña. Esei no tabata problema. Nínive tabatin kunukunan den e stat i hopi kuminda (Jonas 4:11 “hopi bestia”), e mihó ehersito di mundu e tempu ei, ku e mihó armanan. Nan a pensa ku lo ta impusíbel pa konkistá Nínive.

Nahum a profetisá ku Nínive lo kai fásilmente (3:12)...i esei ta presis loke a sosodé. Tabatin un dicho serka e asirianan “Ningun enemigu por konkistá Nínive sino ku e riu (Tigres) ta bira su enemigu promé.” Loke a sosodé a proba ku e dicho ei a kuadra ku realidat.

Tres aña di hopi yobida a kousa e awa den e riu pa oumentá. E medonan, kaldeonan i sintianan a probechá di e situashon aki. Un inundashon a sigui. No ta konosí si e tabata un inundashon natural òf kousá dor di e enemigunan. Ma de todo kaso, e inundashon a pone un sekshon di muraya rònt Nínive kai. Ora rei a tende esei, keriendo ku e dicho a wòrdu kumpli, el bai ku su rikesa, esposanan i konkubinan, èts. den un parti di palasio, sey’ é, i peg’ é na kandela, muriendo den e flamnan.

E enemigu simpelmente a ataká i dreña dor e kibrá di muraya, a mata hopi hende i destruí

e stat (ta parse) sin masha difikultat. I segun Nahum su profesia, “*el (Nínive) a keda kompletamente kòrtá kitá afó*” (1:15).

Nahum a profetisá ku Dios lo “prepará bo graf” (1:14). Dicho echo. Dios a dera Nínive di tal forma ku el a desparesé por completo. Pa síglonan ningun hende tabata sa unda Nínive tabata lokalísá. Ora Alexander e Grandi tabata konkistá e mundu konosí, na aña 331 B.C. tabatin un bataya na Arbela, serka di Nínive. Ma Alexander no tabata sa ku Nínive tabata derá bou di e stòf. Na aña 62 A.D., un historiadó a skirbi ku e “stat i asta e ruinanen di e stat, a despase hopi tempu pasa.” Napoleon tambe a pasa einan sin sa ku e gran stat Nínive a eksistí na e sitio ei. Asta inkredulonan a hasi chechi di Beibel, bisando ku Nínive nunca a eksistí. No tabatin ningun otro rekòrt fuera di Beibel di Nínive su eksistensia. I arkeólogonan ku a buska Nínive, tambe a kana pasa riba dje sin sa. No tabata te aña 1842 ku Sir Austen Layard a porfin a deskubrí e ruinanen di Nínive.

## **VII. LÈSNAN FOR DI E BUKI**

Nos por siña diferente lès for di e buki di Nahum:

### **A. NAHUM TA KONFIRMÁ KU BEIBEL SU PROFESIANAN TA KONFIABEL I INFALIBEL.**

Loke Nahum a profetisá a sosodé “palabra pa palabra.” Semper nos por konfia Skritura, asta ora “ekspertonan” ta sigur ku Beibel a kiboká. Tene pasenshi. Finalmente lo sali na kla ku tabata e “ekspertonan”—no Palabra di Dios—ku a kiboká.

### **B. NAHUM TA LAGA SA KU DIOS TA KASTIGÁ E NASHONAN MALBADO KU TA KASTIGÁ SU PUEBEL**

Bes tras bes den Beibel por nota ku Dios a usa nashonnan malbado pa kastigá Su pueblo. Ma despues, El a tambe a kastigá e nashon malbado. Dios a usa Asira komo Su faha pa suta Su puebel. Ma despues di tempu, El a kastigá Asiria pa su piká! Isaias tambe a komuniká e mésun bèrdat (10:5-12).

### **C. NAHUM TA UN BON BUKI PA LÍDERNAN DI NASHONAN LESA.**

Algun líder polítiko ta pensa ku poder ta duna nan e derechu di hasi i deshásí segun nan ta haña ta bon (sea ta bon òf malu, no ta importá). Nahum ta laga sa bon kla ku esei no ta bèrdat. Asiria a gaba i a abusá di su poder. El a terrorisá medio oriente pa kasi 500 aña. Ma maske Dios tin hopi pasenshi, dia ta bin ku E LO huzga. I Dios a kastigá Asiria!

Nahum ta komuniká bon kla un mensahe ku ta mes aplikabel awendia: “No gaña boso mes: Dios no ta laga hasi bofon di dje; pasobra loke un hende sembra, esaki tambe e lo kosechá” (Galationan 6:7).

### **D. NAHUM SU SKLAMASHON PA VENGANSA RIBA NÍNIVE NO TA VENGANSA PEKAMINOSO**

Beibel ta bisa bon kla ku ta piká pa buska vengansa (Romanonan 12:19). Ta piká pa deseá malu pa otro hende.

Ma esei no ta loke Nahum ta hasi?

Nò!

Nahum ta hasi su apelasion na Dios pa E huzga e malbado i rektifiká e inhustisia. Esei ta un konsepto bíbliko!

Ripará, Nahum no a pidi pa vengansa su nashon ni su mes. En kontraste, Nahum a identifiká su mes ku Dios Su kousa—pidiendo Dios pa huzga maldat. Nahum a ekspresá e rabia di Dios kontra un nashon tan malbado.

Un profeta ta papia pa Dios. E ta e stèm di Dios riba tera. Su deseo ta pa Dios vengansa Su santidat dilanti e nashonnan—pa ku e impero ku pa tantu tempu a suta tur otro nashon kruelmente sin miserikordia. Dor di destruí Asiria totalmente, mundu lo sa ku e echu ku bo tin poder no ta

dunábo e derechu pa abusá di bo poder. Asta e persona mas poderoso di mundu ta kompletamente debil dilanti e rabia di Dios.

### **E. NAHUM TA MUSTRA KU GRASIA NO TA DESHASÍ DI RABIA**

E buki di Nahum por parse un buki severo. Ma di bèrdat e ta un kombinashon di Dios Su rabia i grasía. El a mustra grasía na esnan ku a repintí i rabia na esnan ku ta rebeldiá. Dios no ta ignorá rabia pasobra E ta grasioso. Nos tambe mester mantené un balans asina.

## **Literatura Konsultá**

- Archer, Gleason L. Jr., *A Survey of the Old Testament Introduction* (Chicago: Moody Press, 1985), p. 360-362.
- Baxter, J. Sidlow, *Explore the Book* (Grand Rapids: Zondervan Publishing House, 1960), vol. 4, p. 196-204.
- Demaray, Donald E., *A Layman's Guide to Our Bible* (Los Angeles: Cowman Publishing Company, 1964), p. 116.
- Douglas, Alban, *Old Testament Survey* anotashon di lèsnan na Prairie Bible Institute (Three Hills, 1983), p. 104.
- Hill, Andrew E. & Walton, John H., *A Survey of the Old Testament* (Grand Rapids: Zondervan Publishing House, 1991), p. 395-399.
- Jensen, Irving L., *Jensen's Survey of the Old Testament* (Chicago: Moody Bible Institute, 1978), p. 436-441.
- McGee, J. Vernon, *Thru the Bible* notes, p. 290-291.
- Mears, Henrietta C., *What the Bible is All About* (Minneapolis: World Wide Publications, 1966), p. 311-316.
- Miller, Adam W., *Brief Introduction to the Old Testament* (Anderson, Indiana, Warner Press, 1964), p. 124-127.
- Wiersbe, Warren W., *Expository Outlines on the Old Testament*, (Convington, Kentucky: Calvary Baptist Church, March 1973).
- Wood, Leon J., *The Prophets of Israel* (Grand Rapids: Baker Book House, 1979), p. 315-320.